



UNIVERSITÄTS-
BIBLIOTHEK
PADERBORN

Universitätsbibliothek Paderborn

Liber De Prvdentia Ivstorvm

Juan <de Jesús Maria>

Coloniae Agrippinae, MDCXIV

Cap. II. Conqueritur de obliuione Dei.

[urn:nbn:de:hbz:466:1-46940](https://nbn-resolving.org/urn:nbn:de:hbz:466:1-46940)

& ego vos in omni aduersitate fidelissimè custodiam.

CAP. I I.

Conqueritur de obliuione Dei.

QUID est, quod dilectus populus meus, in domo mea, fecit scelera multa, & oblitus est mei, quasi ego morte ignominiola, & dolore plena nõ redemissim eum? Ego nihil prætermisi, quod ad salutem, & consolationem populi christiani pertineret. Illi enim destinaui supremas misericordias meas; quibus ferè mansuescerent. Eius sunt fidelissima promissa mea, testamentum, & legislatio cælestis gratiæ meæ: & mitissimo corde cum populo acquisitionis versor, quasi ludens in orbe terrarum, vt inspirationibus, & gratuitis donis meis, corda dura emolliam, & vescar dulcissimo fructu sanguinis mei. Et tamen populus meus oblitus est mei, diebus innumeris. Nequè solùm pauperes, & ignari, & optimates, qui negotiis sæcularibus oppressi quasi gigantes gemunt sub aquis mei non recordantur, sed ipsi etiam Ecclesia.

Ecclesiastici, qui profitentur se nosse Deum, & quasi Nazaræi, se totos mihi consecrarunt, mei memoriam parùm curantes, ad studia sæcularia, & ludos, & venationes, ad hortorum culturam, & auaritiæ negotiationem conuertuntur. Quæ peruersio, & duritia cordis est hæc? Quare, filij mei, sequimini deos alienos, qui decipiunt, & corrumpunt animas vestras? Usquequò lugebit terra, quam dedi filijs hominum, qui dereliquerunt me: Conuertimini iam, filij charissimi, & afferte mihi gloriam, & honorem: continuis spiritualium hostiarum oblationibus, & cordis ascensionibus faciem meam citò requirite. Sumite psalmum laudum mearum, & pulsate tympanum ad perenne canticum gratiarum actionis celebrandum. Pergite exercere psalterium iucundum cum cithara, ad canendam totis viribus magnitudinem misericordiæ meæ. Considerate, & admiramini vias meas, & in adinventionibus meis exercemini. Delectamini in factura mea, & in operibus manuum mearum, cum populo, qui scit iubilationem, exultate.

Et experientia cognoscetis quàm suavis, & salutaris sit memoria mea, & quàm tristis, & mortalis obliuio mei. Decernite ex tota fortitudine vestra, memores esse mei, de terra Iordanis, cuius aquis abluti, & sanctificati estis: & imaginem formæ meæ intimis visceribus imprimite. Et ego pergam vobis benefacere, & secundum magnam, & admirabilem misericordiam meam, recordabor vestri, & vocabo vos ad æternam hæreditatem fællicissimi regni mei.

CAP. III.

Dolet super Ecclesiasticis.

QUO MODO obtexit caligine, in furore suo Dominus filiam Sion, dilectam sponsam meam, peccatis Ecclesiasticorum denigratam? Præcipitavit omnia speciosa Iacob, propter scelera filiorum meorum, quorum culpa, egressus est à filia Sion omnis decor eius: quia nobilior, & formosior Ecclesiæ meæ pars grauitè deformata est. Sanctitas illa antiqua Ecclesiasticorum

rum